





駱賓王集序



魯國都雲卿



駱賓王婺州義烏人也年七歲能屬文高宗朝與盧照隣楊炯王勃文詞齊名海內稱焉號為四傑亦云盧駱楊王四才子仕至侍御史後以天后即位頻貢章疏諷諫因斯得罪貶授臨海丞文明中與敬業於廣陵共謀起義兵事既不捷因致逃遁遂致文集悉皆散失後中宗朝降勅搜訪賓王詩筆令雲卿集



焉所載者即當時之遺漏凡十卷此集並是  
家藏者亦足傳諸好事

駱賓王集卷上

賦

螢火賦

余猥以明時久遭幽繫見一葉之已落知四  
運之將終悽然客之為心乎悲哉秋之為氣  
也光陰無幾時事如何大塊是勞生之機小  
知非周身之務嗟乎綈袍匪舊白首如新誰  
明公治之非孰辨臧倉之愬是用中宵而作  
達旦不瞑覩茲流螢之自明哀此覆盆之難



照夫類同而心異者龍蹲歸而宋樹伐質殊  
而聲合者魚形出而吳石鳴苟有會於精靈  
夫何患於異類况乘時而變含氣而生雖造  
化之不殊亦昆蟲之一物應節不憊信也與  
物不競仁也逢昏不昧智也避日不明義也  
臨危不懼勇也事有公情而動興因物而多  
懷感而賦之聊以自廣云耳

伊玄功之播氣有丹鳥之賦象順陰陽而亭  
毒資變化而涵養每寒潛而暑至若知來而  
歲往既發揮以外融亦含光而內朗若夫小  
暑南收大火西流林塘改夏雲物迎秋忽凌  
虛而赴遠乍排叢而出幽如火色之宵映如  
夜光之暗投逝將歸而未返忽欲去而中留  
入槐榆而焰發若改燧而環周繞堂皇而影  
遍疑秉燭以嬉遊點綴懸珠之網隱映落星  
之樓乍滅乍興或聚或散居無定所習無常  
翫曳影周流飄光凌亂泛艷乎池沼徘徊乎  
林岸狀火井之沉熒似明珠之出漢值衝飈



而不烈逢淫雨而逾煥炤灼兮若湛盧之夜  
飛灼爍兮像招搖之夕輝與庭燎而相炫然  
重陰於已昏共爇火而齊息避太陽於始旦  
爾其光不周物明足自資偶仙鼠而伺夜對  
飛蛾之赴媿類君子之有道入暗室而不欺  
同至人之無迹懷明義以應時處幽不昧居  
照斯晦隨隱顯而動息候昏明而進退委性  
命兮幽玄任物理兮推遷化腐木而含彩集  
枯草而蔽煙不貪熱以苟進每和光而曲全

豈如鎔金而自爍寧學膏火之相煎陋蟬蛸  
之習蛻怵螻蟻之慕羶匪傷蜉蝣之夕不羨  
龜鶴之年槍榆飛而控地搏扶起而垂天雖  
小大之殊品豈逍遙之異筌夫何化之斯化  
無使然而自然若乃有來斯通無往不至排  
朱門而獨遠昇青雲而自致匪偷光於鄰壁  
寧假輝於陽遂終徇已以致能靡因人而成  
事物有感而情動迹或均而心異響必應之  
於同聲道固求之於同類始未明於趨捨庸



詎識其指意子尚不知魚之爲樂吾又安能  
知螢之爲利高明兮有融遷變兮無窮哀牛  
倏而化虎羽泉忽兮生熊血三年而藏碧魂  
一變而成虹知戰場之有憐悟冤獄之爲蟲  
彼翺飛之弱質尚矯翼之凌空何微生之多  
躡獨宛頸以觸龍異璧光之照庶同劍影之  
埋豐覬道迷而可復庶幽鑒而或通覽光華  
而自照願形影以相弔感秋夕以殷憂歎宵  
行以熠燿熠燿飛兮絕復連殷憂積兮明且  
煎見流光之不息愴驚魂之屢遷如過隙之  
已來同奔電兮忽焉儻餘光之可照庶寒灰  
之重然

蕩子從軍賦

胡兵十萬起妖氛漢騎三千掃陣雲隱隱地  
中鳴戰鼓迢迢天上出將軍邊沙遠離風塵  
氣塞草長萎霜露文蕩子辛苦十年行回首  
關山萬里情遠天橫劍氣邊地聚笳聲鐵騎  
朝常警銅焦夜不鳴抗左賢而列陣屯右校



以疏營滄波積凍連蒲海雨雪凝寒遍柳城  
若乃地分玄微路指青波邊城暖氣從來少  
關塞寒雲本自多嚴風凜凜將軍樹苦霧蒼  
蒼太史河既拔距以從軍且揚麾而挑戰征  
旆凌沙漠戎衣犯霜霰樓船一舉爭沸騰烽  
火四連相隱見戈文耿耿懸落星馬足駸駸  
擁飛電終取俊而先鳴豈論功而後歿征夫  
行樂踐榆溪倡婦銜怨坐空閨靡蕪舊曲終  
難贈芍藥新詩豈易題池前怯對鴛鴦伴庭

際羞看桃李蹊花有情而獨笑鳥無情而恒  
啼蕩子別來年月久賤妾空閨更難守鳳凰  
樓上罷吹簫鸚鵡杯中寧勸酒聞道書來一  
鴈飛此時緘怨下鳴機裁鴛帖夜被薰麝染  
春衣屏風宛轉蓮花帳窓月矜朧翡翠帷箇  
日新粧如復罷祗應含笑待君歸

五言雜詩

夏日遊德州贈高四

夫在心為志發言為詩詩有不得盡言言有



不得盡意僕少負不羈長逾虛誕讀書頗存  
涉獵學劍不待窮工進不能矯翰龍雲退不  
能棲神豹霧撫循諸已深覺勞生而太夫人  
在堂義須捧檄固仰長安而就日赴帝鄉以  
望雲雖文闕三冬而書勞十上嗟乎入門自  
媚誰相謂言致使君門隔於九重中堂遠於  
千里既而交非得免路是亡羊敬上弊廬竭  
來初服遂得載披玉葉款洽金蘭傾意氣於  
一言締風期於千祀雖交因氣合資得意以

敦交道契言忘少寄言而筌道是以輕投木  
李以代踈麻章句繁蕪心神媿慙庶雅韻

竚辱報章則覲連星開龍文於劍匣素輝

虧月頻驪頷於珠胎云爾

日觀隣全趙星臨俯舊吳隔津關巨寔稽阜  
鎮名都紫雲浮劍匣青山孕寶符封疆恢霸  
道問鼎競雄圖神光包四大皇威震八區風  
煙通地軸星象正天樞天樞限南北地軸殊  
鄉國關門通舜賓比屋封堯德言謝垂鈎隱



來參負鼎職天子不見知群公詎相識未展  
從東駿空戢圖南翼時命欲何言撫膺長歎  
息歎息將如何遊人意氣多白雲梁山曲寒  
風易水歌泣魏傷吳起思趙切廉頗淒斷韓  
王劔生死翟公羅羅 翟公意劔負韓王氣  
驕餌去易論忌途良可畏夙昔懷江海平生  
混涇渭千載契風雲一言忘賤貴去去訪林  
泉空谷有遺賢言投爵里刺來泛野人船締  
交君贈編投分我忘筌成風郢匠斲流水伯

牙絃牙絃忘道術漳濱恣閑逸聊安張蔚廬  
詎掃陳蕃室虛室狎招尋敬愛混浮沉一諾  
黃金信三復白珪心霜松貞雅節月桂朗冲  
襟靈臺萬頃濬學府九流深談玄明毀壁拾  
紫陋籛金鷺濤開碧海鳳彩綴詞林林虛星  
華映水澈霞光淨霞水兩分紅川源四望通  
霧卷天山靜煙銷太史空鳥聲流向薄蝶影  
亂芳叢柳陰低 水荷氣上薰風風月芳菲  
節物華紛可悅將歡促席賞遽爾又歸別積



水帶吳門通波連禹穴贈言雖欲盡機心底  
應絕潘岳本自閑梁鴻不因熱一飄欣狎道  
三月聊棲拙棲拙隱金華狎道訪仙查放曠  
愚公谷消散野人家一頃南山豆五色東陵  
瓜野衣栽薜葉山酒酌藤花白雲離望遠青  
溪隱路賒儻憶幽巖桂猶異折踈麻

在江南贈宋五之問

井絡雙源濬陽侯九派長淪波通地穴委輸  
下歸塘別島籠朝蜃連洲擁夕漲韞珠成積

潤讓璧動浮光浮光疑折水積潤踈圓吐玉  
輪涵地開劔匣連星起風煙標迥秀英靈信  
多美懷德賤遺芳端操慙謀已謀已謬觀光  
牽迹強恓惶揆拙迷三雀勞生昧兩忘彈隋  
空斂笑獻楚自多傷一朝殊默語千里暴炎  
涼炎涼幾遷賀川陸疲臻湊積水架吳濤連  
山橫楚岫風月雖殊昔星河猶是舊姑蘇望  
南浦邠鄆通北斗北斗平生親南浦別離津  
瀟湘一超忽洞庭多苦辛秋江無綠芷寒汀



有白蘋采之將何遺故人漳水濱漳濱已遼  
遠江潭未旋返爲聽短歌行當想長洲苑露  
金薰芻岸風珮搖蘭坂蟬鳴稻葉秋鴈起蘆  
花晚晚秋雲日明亭臬風霧清獨負平生氣  
空牽搖落情占星非聚德夢月詎懸名寂寥  
傷楚奏淒斷泣秦聲秦聲懷舊里楚奏悲無  
已郢路少叢臺蕞臺富竒士溫輝凌愛日壯  
氣驚寒水一願重風雲三冬足文史文史盛  
紛綸京洛多風塵猶輕五車富未重一囊貧

李仙非易託蘇鬼曲難因不惜勞歌盡誰爲  
聽陽春

秋日山行簡梁大官

乘馬陟層阜迴首睇山川攢峯銜宿霧疊嶽  
架寒煙百重含翠色一道落飛泉香吹分巖  
桂鮮雲抱石連地偏心易遠致默體逾玄得  
性靈遊刃忘言已棄筌彈冠勞巧拙結綬倦  
牽纏不如從四皓丘中鳴一絃

晚泊江鎮



四運移陰律三翼泛陽侯荷香銷晚夏菊氣  
入新秋夜烏喧粉堞宿鴈下蘆洲海霧籠邊  
徼江風繞戍樓轉蓬驚別渚逃名謝蟻丘還  
嗟帝鄉遠空望白雲浮

晚渡黃河

千里尋歸路一葦亂平源通波連馬頰迸水  
急龍門照日榮光渾驚風瑞浪翻棹唱臨風  
斷樵謳入聽喧岸迥秋霞落潭深夕霧繁誰  
堪逝川上日暮他鄉魂

晚憇田家

轉蓬勞遠役披薜下田家山形類九折江勢  
急三巴懸梁接斷岸澁路擁崩查霧巖淪曉  
魄風淑漲寒沙心迹一朝舛關山萬里賒龍  
章徒表越閩俗本非華旅行悲泛梗離贈斷  
踈麻唯有寒潭菊獨似故園花

宿山庄

金陵一起忽玉燭幾還周露積吳臺草風入  
郢門楸林虛宿斷霧磴險掛懸流拾青非漢



策緇化類秦裘牽迹猶多蹇勞生未寡尤獨  
此他鄉夢空山明月秋

出石門

層巖遠接天絕嶺上棲煙松低輕蓋偃藤細  
弱鈎懸石明如掛鏡苔分似列錢暫策為龍  
杖何處得神仙

至分陝

陝西開勝壤邵南分沃疇列樹巢維鵲平渚  
下睢鳩懣棠疑忽剪曳葛似攀膠至今王化

美非獨在隆周

夏日夜憶張二

伏枕憂思深擁膝獨長吟烹鯉無尺素筌魚  
勞寸心踈麻空有折芳桂湛無斟廣庭含夕  
氣閑宇澹虛陰織蟲垂夜砌驚鳥棲暝林驩  
娛百年促羈病一生侵詎堪孤月夜流水入  
鳴琴

寓居洛濱對雪憶謝二

旅思眇難裁衝飈限易哀曠望洛川晚飄飄



瑞雪來積彩明書帳流韻繞琴臺色奪迎仙  
羽花避犯靈梅謝庭賞方逸素扉掩未開高  
人儻有訪興盡詎須廻

北眺春陵

攬轡疲宵邁驅馬倦晨興旣出封泥谷還過  
避雨陵山行明照上谿宿密雲蒸登高徒欲  
賦詞殫獨撫膺

夏日遊目聊作

暫屏囂塵累言尋物外情致逸心逾默神幽  
體自輕浦夏荷香滿田秋麥氣清詎假滄浪  
上將濯楚臣纓

同崔駙馬曉初登樓思京

麗譙通四望繁憂起萬端綺疎低晚魄鏤檻  
肅初寒白雲鄉思遠黃圖歸路難唯餘西向  
笑暫似當長安

月夜有懷簡諸同病

閒庭落景盡踈簾夜月通山靈響似應水淨  
望如空棲枝猶繞鵲邊渚未來鴻可歎高樓



婦悲思杳難終

叙寄員半千

薄宦三河道自負十餘年不應驚若厲祇爲  
直如弦坐歷山川險吁嗟陵谷遷長吟空抱  
膝短翮詎冲天魂歸滄海上望斷白雲前釣  
名勞拾紫隱迹自談玄不學多能聖徒思鴻  
寶仙斯志良難已此道豈徒然嗟爲刀筆吏  
耻從繩墨牽岐路情雖狎人倫地本偏長揖  
謝時事獨往訪林泉寄言二三子生死不來

旋

詠懷古意上裴侍郎

二十二餘罷鬢是潘安仁四十九仍入年非  
朱買臣縱橫愁繫越坎壈倦遊秦出籠窮短  
翮委轍涸枯鱗不需用彈鋏欲誰申天  
子未驅策歲月幾沉淪輕生長慷慨效死獨  
殷勤徒歌易水客空老渭川人一得視邊塞  
萬里可苦辛劔匣胡霜影開弓漢月輪金方  
動秋色鐵騎想風塵爲國堅誠款捐軀志賤



貧勒功思比憲決略暗欺陳若不犯霜雪虛  
擲玉京春

寒夜獨坐遊子多懷簡知己

故鄉眇千里離憂積萬端鶉服長悲碎蝸廬  
未卜安富鈎徒有想貧鋏為誰彈柳秋風葉  
脆荷晚露文團晚金叢岸菊餘佩下幽蘭伐  
木傷心易維乘歸去難獨有孤明月時照客  
庭寒

春夜韋明府宅宴

酌桂陶芳夜披薛嘯幽人雅琴馴魯雉清歌  
落范塵宿雲低迥蓋殘月上虛輪幸此承恩  
洽聊當故鄉人

送宋五之問得涼字

願言遊泗水支離去二漳道術君所篤筌蹄  
余自忘雪威侵竹冷秋爽帶池涼欲驗離襟  
切岐路在他鄉

七言古詩

帝京篇



山河千里國城闕九重門不覩皇居壯安知  
天子尊皇居帝里峻函谷鶉野龍山侯甸服  
五緯連影集星躔八水分流橫地軸秦塞重  
關一百二漢家離宮三十六桂殿陰岑對玉  
樓椒房窈窕連金屋三條九陌麗城隈萬戶  
千門平旦開複道斜通鳩鵲觀交衢直指鳳  
凰臺劔履南宮入簪纓北闕來聲明冠裳宇  
文物象昭回鈎陳肅蘭所壁沼浮槐市銅羽  
應風迴金莖承露起校文天祿閣習戰昆明

水朱邸抗平臺黃扉通戚里平臺戚里帶崇  
墉炊金饌玉待鳴鍾小堂綺帳三千戶大道  
青樓十二重寶蓋彫鞍金絡馬蘭窓繡柱玉  
盤龍綺柱璇題粉壁映鏘金鳴玉王侯盛王  
侯貴人多近臣朝遊北里暮南隣陸賈分金  
將讌喜陳遵投轄尚留賓趙李經過密蕭朱  
交結親丹鳳朱城白日暮青牛紺幘紅塵度  
依客珠彈垂楊道倡婦銀鈎采薪路倡家桃  
李自芳非京華遊俠盛輕肥延年女弟雙飛



入羅敷使君千騎歸同心結縷帶連理織成  
衣春朝桂樽樽百味秋夜蘭燈燈九微翠幌  
珠簾不獨映清歌寶瑟自相依日論二十八  
年是寧知四十九年非古來榮利若浮雲人  
生倚伏信難分始見田竇相移奪俄聞衛霍  
寸功勲未馱金陵氣先開石槨文朱門無後  
張公子霸亭誰畏李將軍相顧百齡皆有待  
居然萬化成應改桂枝芳氣已銷亡栢梁高  
宴今何在莫矜一旦擅豪華自言千載長驕  
奢倏忽搏風生羽翼須臾失浪委泥沙黃雀  
徒巢桂青門遂種瓜黃金銷鑠素絲變一貴  
一賤交情見紅顏宿昔白頭新脫粟布衣輕  
故人故人有湮淪新知無意氣灰死韓安國  
羅傷翟廷尉已矣哉歸去來馬卿辭蜀多文  
藻揚雄仕漢乏良媒三冬自矜成足用十年  
不調幾遭迴汲黯薪逾積孫洪閣未開誰惜  
長沙傳獨負洛陽才

疇昔篇



少年重英俠弱歲賤衣冠既託寰中賞方承  
膝下歡遨遊灞陵曲風月洛城端且知無玉  
饌誰肯逐金丸金丸玉饌盛繁華自言輕侮  
季倫家五霸爭馳千里馬三條競騫七香車  
掩映飛軒乘落照參差步障引朝霞池中舊  
水繞懸鏡屋裏新粧不讓花意氣風雲倏如  
昨歲月春秋屢迴薄上苑頻經柳絮飛中園  
幾番梅花落當時門客今何在疇昔交遊已  
踈索莫教憔悴損容儀會得高秋雲霧廓淹

留坐帝鄉無事積炎涼一朝披短褐六載奏  
長廊賦文慙昔馬執戟慕前楊揮戈出武帳  
荷筆入文昌文昌隱隱皇城裏由來奕奕多  
才子潘陸詞鋒駱驛飛張曹翰苑縱橫起卿  
相未曾識王侯寧見擬徒勞倦負薪何處逢  
知己判將運命賦窮通從來奇舛任西東不  
永棄同芻狗且復飄飄類轉蓬容髮年年  
異春花歲歲同榮親未盡禮徇主欲申功脂  
車秣馬辭鄉國縈轡西南使印繫玉壘銅梁



不易攀地角天涯眇難測鶯轉蟬吟有悲望  
鴻來鴈度無音息陽關積霧萬里昏劔閣連  
山千里色蜀路何悠悠岷峯阻且脩迴腸隨  
九折迸淚連雙流寒光千里暮露氣二江秋  
長途看束馬平水且沉牛華陽舊地標神制  
石鏡娥眉真秀麗諸葛才雄已號龍公孫躍  
馬輕稱帝五丁卓犖多竒力四士英靈用文  
藝雲氣橫開八陣形橋影遙分七星勢川平  
煙霧開遊戲錦城隈墉高龜望出水淨鴈文

迴尋妹入酒肆訪客上琴臺不識金貂重偏  
惜玉山頽他鄉冉冉消年月帝里沉沉限城  
闕不見猿聲助客啼唯聞旅思將花發我家  
迢遞關山裏關山迢遞不可越故園梅柳尚  
有餘春來勿使芳菲歇解袂欲言歸執袂愴  
多違北梁俱握手南浦共沾衣別情傷去蓋  
離念惜光輝梢卯有何託木落有南飛平陸  
春來酒應熟相將園閣望青溪且用藤盃泛  
黃菊十年不調為貧賤百榼屢遷隨倚伏祇



為須來負郭田使我再干州郡祿百年鬱鬱  
少騰遷萬里迢迢入鏡川涘江沸潮衝白浪  
淮海長波接遠天叢竹凝朝露孤山起暝煙  
賴有邊城月常伴客旌懸東南美箭稱吳會  
名都隱軫三江外塗山執玉應昌期曲水開  
襟重文會仙鏞流音鳴鶴嶺寶劔分輝落蛟  
瀨未看白馬對蘆芻且覺浮雲似車蓋江南  
節序多文酒屢經過共踏春江曲俱唱采菱  
歌舟移疑入鏡棹舉若乘波風光無限極歸

檝礙池荷眺聽煙霞正流盼即從王事歸艫  
轉芝田花發屢徘徊金谷 明重遊行登高

南適咄梁叟憑軾西征想潘椽岸開華岳聳  
疑蓮木激龍門急如箭人事謝光陰俄遭霜  
露侵偷存七尺影分役九泉深窮途行泣玉  
憤路未藏金茹荼徒有歎懷橘獨傷心年來  
歲去成銷鑠懷抱心期漸寥落掛冠裂冕已  
辭榮南畝東臯事耕鑿賓階客院常踈散蓬  
徑柴扉終寂寞自有林泉堪隱棲何必山中



事丘壑我住青門外家臨素澹濱遙瞻丹鳳  
闕斜望黑龍津荒衢通獵騎窮巷抵樵輪時  
有桃源客來訪竹林人昨夜琴聲奏悲調旭  
旦含顰不成笑果乘驄馬發囂書復道郎官  
稟綸誥治長非罪曾縲紲長孺然灰也經溺  
高門有閣不圖封峻筆無聞歛敷妙適離京  
兆謗還從御府彈炎威資夏景平曲况秋翰  
畫地終難入書空自不安吹毛未可待搖尾  
且求食丈夫坎壈多怨疾契闊迤邐盡今日

慎罰寧憑兩造辭嚴科直掛三章律鄒衍銜  
悲衝燕獄李斯抱怨拘秦格不應白髮頓成  
絲直爲黃沙暗如漆紫禁終難叫朱門不易  
排驚魂聞葉落危魄逐輪埋霜威遙有勵雪  
杜更無階含冤欲誰道飲氣獨居懷忽聞驛  
使發關東傳道天波萬里通涸轍去鱗先逝  
海幽禽釋網便翔空舜澤堯曦方有極讒言  
巧佞謹無窮誰能跼迹依三輔會就商山訪  
四翁



行軍軍中行路難

君不見封狐雄虺自成群憑深負固結妖氛  
玉璽分兵徵惡少金壇授律動將軍將軍擁  
旄宣廟略戰士橫戈靜夷落長驅一息背銅  
梁直指三危登劔閣閣道迢迢起戍樓劔門  
遙裔俯靈丘卬關九折無平路江水雙源有  
急流征役無期返他鄉歲月晚杳杳丘陵出  
蒼蒼林薄遠途危紫蓋峯路澁青泥坂去去  
指哀牢行行入不毛絕壁千里險連山四望

高中外分區宇夷夏殊風土交趾枕南荒昆  
彌臨北戶川源饒毒霧谿谷多淫雨行潦四  
時流崩崖千歲古漂梗飛蓬不暫安捫藤引  
葛陟危巒昔時聞道從軍樂今日方知行路  
難滄江綠水東流駛炎州丹徼南中地南中  
南斗映星河秦關秦塞阻煙波三春邊地風  
光少五月瀘川瘴癘多朝驅疲斥候夕息倦  
樵歌向月響繁弱連星轉太阿重義輕生懷  
一顧東征西伐凡幾度夜夜朝朝斑鬢新年



年歲歲戎衣故灞城隅滇池水天涯望轉積  
地際行無已徒覺炎涼節物非不知關山千  
萬生盡置勿重陳征行多苦辛且悅清笳梅  
柳曲詎憶芳園桃李人絳節紅旗分日羽丹  
心白刃酬明主但令一被君王知誰憚三邊  
征戰苦行路難幾千端無復歸雲憑短翰空  
餘望日想長安

行路難

君不見玉關塵色暗邊庭銅鞮雜虜寇長城

天子按劍徵餘勇將軍受賑事橫行七德龍  
韜開玉帳千里鼉鼓疊金鉦陰山苦霧埋高  
壘交河孤月照連營連營去去無窮極擁旆  
遙遙過絕國陣雲朝結晦天山寒沙夕漲迷  
疏勒龍鱗水上開魚貫馬首山前振雕翼長  
驅萬里讐祁連分麾三命武功宣百發烏號  
遙碎柳七尺龍文迥照蓮春來秋去移灰琯  
蘭閨柳市芳塵斷鴈門迢遞尺書稀鴛被相  
思雙帶緩行路難誓令氛祲靜皋蘭但使封



侯龍額貴詎隨中婦鳳樓寒

艷情代郭氏荅盧照鄰

迢迢芊路望芝田  
眇眇函關恨蜀川  
歸雲已落涪江外  
還鴈應過洛水邊  
洛水傍連帝城側  
帝宅層臺垂鳳翼  
銅駝路上柳千條  
金谷園中花幾色  
柳葉園花處處新  
洛陽桃李應芳春  
妾向雙流窺石鏡  
君住三川守玉人  
此時離別那堪道  
此日空林對芳沼  
芳沼徒遊比目魚  
幽徑還生拔心草  
流風迴雪僅便娟

驩子魚文實可憐  
擲果河陽君有分  
貨酒成都妾亦然  
莫言貧賤無人重  
莫言富貴應須種  
綠珠猶得石崇憐  
飛燕曾經漢皇寵  
良人何處醉縱橫  
直如循默守空名  
倒提新練成慊慊  
翻將故劔作平平  
離前吉夢成蘭兆  
別後啼痕上竹生  
別日分明相約束  
已取宜家成誠勗  
當時擬弄掌中珠  
豈謂先摧庭際玉  
悲鳴五里無人問  
腸斷三聲誰爲續  
思君欲坐望夫臺  
端居懶聽將雛曲  
沉沉落日向山



低簷前歸燕並頭栖抱膝當窓聽夕兔側耳  
空房聽晚鷄舞蝶臨階祗自舞啼鳥逢人亦  
助啼獨坐傷孤枕春來悲更甚峨眉山上月  
如眉濯錦江中霞似錦錦字迴文欲贈君劔  
壁層峯自糾紛平江淼淼分青浦長路悠悠  
間白雲也知京洛多佳麗也知山岫遙虧蔽  
無那短封即踈索不在長情守期契傳聞織  
女對牽牛相望重河隔淺流誰分迢迢經兩  
歲誰能脉脉待三秋情知唾井終無理情知  
覆水也難收不復下山能借問更向盧家字  
莫愁

代女道士王靈妃贈道士李榮

玄都五府風塵絕碧海三山波浪深桃實千  
年非易待桑田一變已難尋別有仙居對三  
市金闕銀宮相向起臺前鏡裏伴仙娥樓上  
簫聲隨鳳史鳳樓迢遞絕塵埃鸞時物色正  
徘徊靈芝紫檢參差長仙桂丹花重疊開雙  
童綽約時遊陟三鳥聯翩報消息盡言真侶



出遨遊傳道風光無限極輕花委砌惹裾香  
殘月窺窓覘幌色箇時無數併妖妍箇裏無  
窮總可憐別有衆中稱黜帝天上人間少流  
例洛濱仙駕啓遙源淮浦靈津符遠筮自言  
少小慕幽玄只言容易得神仙佩中邀勒經  
時序簫裏尋思復幾年尋思許事真情變二  
八容華識少選漫道燒丹止七飛空傳化石  
曾三轉寄語天上弄機人寄語河邊值查客  
乍可忽忽共百年誰使遙遙期七夕想知人

意自相尋果得深心共一心一心一意無窮  
已投漆投膠非足擬只將羞澁當風流持此  
相憐保終始相憐相念倍相親一生一代一  
雙人不投丹心比玄石惟將濁水况清塵只  
言柱下留期信好欲將心學松薜不能京兆  
畫娥眉翻向成都騁騶引青牛紫氣度靈關  
尺素艷鱗去不還連苔上砌無窮綠修竹臨  
壇幾處斑此時空牀難獨守此日別離那可  
久梅花如雪柳如絲年去年來不自持初言



別在寒偏在何悞春來春更思春時物色無  
端緒雙枕孤眠誰分許分念嬌鶯一種啼生  
憎燕子千般語朝雲旭日照青樓遲暉麗色  
滿皇州落花泛泛浮靈沼垂柳長長拂御溝  
御溝大道多奇賞侯客妖容迺來往寶騎車  
花鐵作錢香輪鶩水珠為網香輪寶騎競繁  
華可憐今夜宿倡家鸚鵡杯中浮竹葉鳳凰  
琴裏落梅花許輩多情偏送款為問春花幾  
時滿千回鳥信說衆諸百過鶯啼說長短長

短衆諸判不尋千回百過浪關心何曾與意  
西隣玉未肯留情南陌金南陌西鄰成自保  
還轡歸期須及早為想三春狹斜路莫辭九  
折叩關道假令白里似長安使青牛學劍  
端蘋風入馭來應易竹杖成龍去不難龍駮  
去去無消息鸞鏡朝朝減容色君心不記下  
山人妾欲空期上林翼上林三月鴻欲稀華  
表千年鶴未歸不分淹留乘路待祇應直取  
桂輪飛



駱賓王集卷上

當湖  
陳  
歐  
登  
題



